




Հաւատամք եւ ի ՄԻ միայն ԸՆԴՀԱՆՐԱԿԱՆ եւ ԱՌԱՔԵԼԱԿԱՆ, (ՍՈՒՐԲ) եկեղեցի

«Ի հնգետաասաներորդի ամի տէրութեան Տիբերեայ կայսեր, ի դատաւարութեան Հրէաստանի Պիղատոսի Պոնտացոյ եւ ի չորրորդապետութեան Գալիլեացոց Հերովդի, եւ Փիլիպպոսի եղբօր նորա չորրորդապետութեան ի Տուրացոց եւ ի Տրաքոնացոց աշխարհին, եւ ի չորրորդապետութեան Լիսանեայ Աբիլենցոյ, եւ ի քահանայապետութեան Աննայի եւ Կայիափայ եղեւ բան Աստուծոյ ի վերայ Յովհաննու որդոյ Զաքարիայ յանապատի անդ» (Ղուկաս Գ: 1—2):

Վերոյիշեալ ստոյգ եւ հաւաստի պատմական համակարգի մէջ է, որ Աւետարանիչը տեղադրում է Քրիստոսի առաքելութեան սկիզբը: Քրիստոնէութիւնը որպէս կրօն, արդիւնք է Աստուածային միջամտութեանը՝ մարդկային պատմութեան ոլորտից ներս, Յիսուսի մարդեղութեամբ: Քրիստոնէական կրօնը պատմականօրէն հիմնադրելու ցայտուն փաստարկներից մէկը Հաւատոյ Հանգանակի մէջ տեղադրւած՝ «եւ խաչեցաւ վասն մեր առ Պոնտացով Պիղատոսի»¹ արտայայտութիւնն է: Ինչո՞ւ գաւառական աննշան մի պաշտօնեայի անունը յիշատակում է «Հաւատոյ Հանգանակի» կարճ, բայց եւ Քրիստոնէական հաւատքի ամենապերճախօս լայտարարութեան մէջ, եթէ ոչ ընթերցողին ու լսողին յիշեցնելու Յիսուսի պատմական անձնաւորութիւն լինելը, իբրեւ մի մարդ, ծնունդով հրեայ, որ չարչարուեց եւ խաչուեց Հռոմէական իշխանութեան լծի տակ, եւ որին ժամանակակից մարդիկ տեսել, լսել եւ նոյնիսկ ձեռք էին տուել. «Որ էրն ի սկզբանէ գորմէ լուաքն՝ որում ականատեսն իսկ եղեաք. ըստ որ հաչեցաքն, եւ ձեռք մեր շօշափեցին ի վերայ բանին կենաց» (Ա. Յովհ. Ա. 1):

Քրիստոսի առաքելութեան պատմականութիւնը դրսեւորում է նաեւ այն առաքելութեամբ, որ նրա հետեւորդները ի գործ դրին Աւետարանի պատգամը տարածելու Յունա-Հռոմէական աշխարհում: Երբ Յիսուսը պատրաստում էր թողնել իր աշակերտներին եւ վերադառնալ Հօր մօտ՝ յաւտարարեց. «ի հասանել հոգւոյն սրբոյ ի վերայ ձեր, եւ եղիջիք ինձ վկայք լԵրուսաղէմ եւ յամենայն Հրէաստանի եւ ի Սամարիա, մինչեւ ի ծագս երկրի» (Գործք. Ա. 8):

Աւետարանի հարուստ իրադարձութիւններից ամենակարեւորին՝ յարութեանը հաւաստիութիւն հաղորդելու համար անհրաժեշտ էր ականատեսների անսուտ վկայութեան. «Պետրոս եւ Յակովբոս, Յովհաննէս եւ Անդրէաս, Փիլիպպոս եւ Թովմաս, Բարթողիմէոս եւ Մատթէոս, Յակովբոս Ալ-

փեան եւ Շմաւովն նախանձայոյզ եւ Յուդա Յակովբեան: Սոքա ամենեքեան էին հանապազորդեալ միաբան յաղօթս հանդերձ կանամբք եւ Մարեմա մարբն Յիսուսի եւ եղբարքք նորա» (Գործք. Ա 13—14): Տասներկու վկաները (Յուդային եթէ չհաշուենք) տասնմէկը, Յիսուսի ազգակիցներից մի քանիսի աջակցութեամբ Աւետարանի պատգամների առաջին տարածողները եղան: Գողգոթայի ողբերգութեանը յաջորդած յարութեան եւ Տիրոջ խոստացած «երկնից արքայութեան» ականջալուր ժամանակակիցները շարունակում էին հարցնել. «Տէր՝ եթէ ի ժամանակի աստ յայսմիկ հասուցանելոց իցես զարքայութիւն Իսրայէլի» (Գործք. Ա 6):

Աշակերտները օր-օրի հետեւել էին Ուսուցչին, որպէսզի հետագայում, երբ մենակ մնացին կարողանալին Յիսուսի գործը շարունակել: Մատաթիայի ընտրութեան կապակցութեամբ պարզուեց. «պարտ է յարանցս յայցանէ եկելոցս ընդ մեզ յամենայն ժամանակի, յորում մութ եւ ել առ մեզ Տէր Յիսուս սկսեալ ի մկրտութենէն Յովհաննոս մինչեւ ցօրն՝ յորում վերացաւ ի մէնջ, վկայ յարութեան նորա ընդ մեզ լինել միում ի սոցանէ» (Գործք. Ա 21—22): Աշակերտները, որ պատրաստ էին հանդէս գալ որպէս ականատես վրկաներ Յիսուսի յարութեան, դեռեւս ամբողջ խորութեամբ չէին գիտակցում իրենց վստահուած առաքելութեան տիեզերական նշանակութիւնը: Միայն այն ժամանակ, երբ Յիսուսի խոստացած վերադարձը իրականացաւ՝ նրա համախոհները քաջութիւն ունեցան ազդարարելու մարդկութեան Յիսուսի աստուածութիւնը: Ա. Հոգին իջաւ իւրաքանչիւրի վրայ եւ նրանք «սկսան խօսել յայլեալ լեզուս որպէս եւ հոգին տալր բարբառել նոցա» (Գործք. Բ 4): Այս դէպքից յետոյ Պետրոս առաքեալը համաձակուեց յայտարարել. «Արեւմտարտի գիտացել ամենայն տունն Իսրայէլի, զի եւ տէր զնա եւ օծեալ Աստուած արար, զայն Յիսուս՝ զոր դուքն խաչեցէք» (Գործք. Բ 36):

Նոր ուխտի համայնքի կազմաւորման համար վճռորոշ նշանակութիւն ունեցան ականատեսների վկայութիւնը՝ Յիսուսի յարութեան եւ Ա. Հոգու բաշխման իրադարձութիւնները, որոնց շնորհիւ նոր-նոր կազմաւորուող եկեղեցու գործունէութիւնը ոչ միայն անհերքելի վաւերականութիւն ստացաւ, այլեւ արդիւնատէս եղաւ. «եւ յաւելան յաւոր յայնմիկ ոգիք իբրեւ երեք հազարք» (Գործք. Բ 41):

Եկեղեցիին գոյութիւնը սերտօրէն պայմանաւորուած է Ա. Հոգու բաշխման եւ Առաքեալների, որպէս ականատեսի քարոզչութեան, որից եւ բխում է քրիստոնէական եկեղեցու թէ Սուրբ եւ թէ Առաքելական լինելը: Ինչպէ՞ս պէտք է հասկանալ եկեղեցուն տրուած «սուրբ» եւ «առաքելական» բնորոշումները:

Ա. Հոգին ոչինչ նոր չի անելացնում այն առաքելութեանը, որ Յիսուս արդէն կատարել էր եւ աւանդ թողել, որովհետեւ՝ «Զի ի նմա Աստծուն հաճեցաւ ամենայն լրումն աստուածութեան բնակել» (Կող. Ա:19): Ա. Հոգին է «որ վկայէ, զի հոգին իսկ է ճշմարտութիւն (Ա. Յովհ. Ե 6), «նա զիս փառաւորեցէ» ասում է Յիսուս, «զի յիմէ անտի առնուցու եւ պատմեցի ձեզ» (Յովհ. ԺԶ:14): Որով Ա. Հոգու գալը ոչ թէ հուազեցնում կամ հեղինակաւորում է Առաքեալների վկայութիւնները, այլ՝ հաստատում, լրացնում:

Բաւարար հիմք կայ եզրակացնելու, որ Ա. Հոգու վկայութիւնը վճռական նշանակութիւն ունեցաւ Նոր Կտակարանի Կանոնի կազմութեան համար: Պէտք է նկատել, որ Չորս Աւետարանների, Գործք Առաքելոցի, Պօղոսի Թղթերի, եւ Յայտնութեան գրքերի վկայութիւնների նպատակն է՝ լրացուցիչ տեղեկութիւններ հաղորդել Յիսուսի կեանքի առաքելութեան, մասնաւոր-

րաբար յարութեան մասին: Քննելով վերը թուարկուած երկերը տեսնում ենք առաքելների գործունէութեան շրջանակը: Հետեւութիւնը արդէն գալիս է ինքնին, գրաւոր երկերի հեղինակները, իրենք իսկ առաքելութեան ու ներշնչանքի Աստուածային եւ մարդկային համատեղ գործունէութեան ուղին են մատնանշում: Ուշագրաւ է, որ աւանդութիւնը առաքելական ծագում եւ ճանաչում է վերագրում նաեւ Մարկոսի եւ Դուկասի Աւետարաններին, թէեւ վերջիններս բուն առաքելների փաղանգին չէին պատկանում եւ Յիսուսին անգամ չէին տեսել: Այս գուց. Աւետարաններին վստեքականութիւն հաղորդելու համար աւանդութիւնը դիմում է Պետրոս եւ Պօղոս առաքելների վկայութեան, քանի որ սոյն երկու գործերը պարունակում են յիշեալ առաքելների գործունէութեան անդրադարձը: Այլ երկերի հաւաստիութիւն հաղորդելու այս ձեւը հետագայում եւս օգտագործուեց Նոր Կտակարանի Կանոնի մէջ ներառնել այլ գործեր (Թուղթ առ Եբրայեցիս, Յայտնութիւն Յովհաննոս), որոնց հեղինակային պատկանելիութեան շուրջ ամենավաղ շրջանից կասկածներ են եղել, որը շարունակում է մինչեւ հիմա: Այս կապակցութեամբ, առաքելների իբրեւ ականատես վկայումների կ'արժէքազրկուէր՝ առանց Հոգեգալստեան հրաշքի, երբ Ա. Հոգին իջաւ ոչ միայն առաքելների վրայ այլ նաեւ ամբողջ եկեղեցու: Հետեւաբար եկեղեցին հիմնաւորուեց ոչ միայն առաքելների գործունէութեամբ, այլեւ շնորհիւ, նրանց վրայ իջած Ա. Հոգու ներշնչումով: Չխորանալով այլ մանրամասնութիւնների մէջ, կարող ենք ասել, որ եկեղեցու կազմաւորման օրերին, ոչ մէկի մտքով չանցաւ Նոր Կտակարանի Կանոնի մէջ ներառնել գրքեր, որոնք առաքելական ծագում չունէին: Ա. Հոգու ազդեցութիւնն է բնորոշում որեւէ գրքի վստեքականութիւնը: Ուղղափառ գաղափարների ու վկայութիւնների հիմնական ակունքները սրանք են:

Կարող ենք համոզուած ասել, որ եկեղեցու սկզբնական շրջանի պատմութիւնը ներկայացուած է Գործք Առաքելոցի էջերում, շարադրուած Դուկաս Աւետարանչի ձեռքով, որը հեղինակն է նաեւ Երրորդ Աւետարանի: Գիրքը բաժանում է երկու անհաւասար մասերի, առաջին մասը Գլխ. Ա.—ԺԱ վերաբերում է Երուսաղէմի եկեղեցու ձեւաւորման, հոգեգալստեան դէպքի նրկարագրութեան, ներքին կազմակերպութեան, եւ ականաւոր ղեկավար անձերի գործունէութեան նկարագրութեանը: Երկրորդ մասը, որ ընդգրկում է գրքի մնացած գլուխները, յատկացում է հեթանոսաց առաքելի գործունէութեան, որին Դուկաս անուանում է Պօղոս (Գործք. ԺԳ 9), թէեւ սկզբնական գլուխներում նրան կոչում է Սաւուղ:

Երուսաղէմի համայնքը ղեկավարում էր 12 առաքելների կողմից. Պետրոս առաքելը, որ եռանդուն, ընդգծուած անհատականութիւն էր, հանդէս է գալիս միւսների անունից: Ուստի տեղին կը լինի նշել, որ Յիսուսի հանրայայտ խօսքերը. «զի դու ես վեմ, եւ ի վերայ այդք վիմի շինեցից գեկեղեցի իմ» (Մատթ. ԺԶ 18)² արտասանուած Կեսարիա տանող ճանապարհին, ցուցանիշներից մէկն է վեր ակնարկուած դերի, որ Պետրոսը ունէր Երուսաղէմում:

Երուսաղէմի եկեղեցին բազմաթիւ եկեղեցիներից ոչ թէ մէկն էր, այլ հէնց ինքը բուն ԵԿԵՂԵՑԻՆ էր, միակ եկեղեցին՝ «մնացորդացը» Հին Կտակի, որի մասին մարգարէները գուշակել էին, եւ որը որդեգրել էր դրկում Գրկչին: Հեթանոսաց եկեղեցին, որի յախտոն շատագովն ու կազմակերպողն էր Պօղոս առաքելը, որի համար արժանանում է «ձիթենիդ վայրենի» (Հռովմ. ԺԱ 17) պատուաստում արմատին բնութագրմանը: Առաջնորդ-

ուելով 12 առաքելների կողմից, սկզբնական հրեայ-քրիստոնեայ նորադարձներից կազմուած գաղութը ակնկալում էր ստեղծումը երկնային Երուսաղէմի որպէս սուրբ քաղաք, որ պիտի իջնէր երկնքից, ըստ Յայտնութեան գրքի գուշակութեան. «Եւ պարիսպ քաղաքին ունէր հիմունս երկոտասան, եւ ի նոսա երկոտասան անուանք երկոտասան առաքելոց գառինն» (Յայտ. ԻԱ 14): Պատմութիւնը եւ վախճանաբանութիւնը այնքան սերտօրէն են միահիստուած Գործք Առաքելոցի սկզբնական գլուխներում, որ դժուար է մէկը միւսից բաժանել: Պետրոս իր հոգեգալստեան ճառի մէջ, Ս. Հոգու գալուստը ընկալում էր ճակատագրական սրութեամբ, որպէս իրականացումը Յովել մարգարէի վախճանաբանական գուշակութեան. «եւ էին միաբան ամենեքեան ի սրահին Սողովմոնի: Եւ այլոց անտի ոչ ոք իշխէր մերձեցալ առ նոսա. այլ յարգէր զնոսա ժողովուրդն» (Գործք. Զ 12—13):

Գործք Առաքելոցի 12-րդ գլուխը եկեղեցու այս սկզբնական շրջանի պատմութիւնը բերում հասցնում է աւարտին: 12 առաքելներից կազմուած ղեկավար մարմինը դադարում է որպէս այդպիսին գործելուց: Հերովդէս «սպան զՅակովբոս զեղբայրն Յովհաննոս սրով» (Գործք. ԺԲ 2) եւ ըստ որոշ տուեալների ոչ մի ճիգ չարուեց նրա տեղ ընտրել մէկ ուրիշի, ինչպէս արուեց Յուդայի բացակայութեան դէպքում: Պետրոս իր ձերբակալութիւնից եւ փախուստից յետոյ՝ «ել գնաց յայլ տեղի» (Գործք. ԺԲ 17): Թէեւ Պետրոսը պահում է իր հեղինակութիւնը եւ հմայքը, որպէս առաքելներից առաջինը բայց այդ հեղինակութիւնը բացարձակ չէր, քանի որ Պօղոս հակառակում է նրան եւ ճիշդաւորման սերմեր ցանում (Գաղ. Բ): Երուսաղէմում առաջնութիւնը աստիճանաբար անցնում է Յակովբոս առաքելին (Գործք. ԺԵ), որը չէր պատկանում 12-ի խմբին: Պետրոս առաքելի ունեցած դերը եւ թողած ժառանգութիւնը եկեղեցու կազմակերպութեան բնագաւառում բարձր է գնահատում, յատկապէս եպիսկոպոսի պաշտօնի հաստատման առնչութեամբ, եւ յիշում ու մեծարում է որպէս «յառաքելութիւն թլփատութեան» (Գաղ. Բ 7—8), որ հեռանկար չունեցաւ, քանի որ հրեաները մերժեցան Փրկչին, իսկ այն «մնացորդացը» որ ընդունեց Յիսուսին՝ ինչպէս գիտենք Յ. Բ. եօթանասունական թուականներին լրի կործանուեց:

Այս փուլերից յետոյ ասպարէզ է մտնում հեթանոսաց առաքելը Պօղոս, որին է յատկացուած Գործք Առաքելոցի ԺԳ.—ԻԸ գլուխները: Գրեթէ մի ամբողջ յիսնամեակ իշխելով, նա քարոզչական շրջագայութիւնների մի շոցով ողջ միջերկրականի շրջակայ քաղաքներում հաստատում է նոր համայնքներ: Աստծոյ բոլոր եկեղեցիները Երուսաղէմի եկեղեցու նման, արժանի են ստանալու Աւետարանի լոյսը եւ Ս. Հոգու շնորհները: Հակառակ բոլոր վիճաբանութիւններին, Պօղոս միշտ զօրավիգ կանգնեց Պաղեստինի փոքրիկ համայնքին եւ յարգեց այդ աթոռի նախագահութիւնը որպէս աղբիւր եւ պաշտպան հաւատի, նոյնիսկ, երբ 12-ի խումբը վերջնականապէս թողել էր Երուսաղէմը: Պօղոս առաքելը, կրօնա-ուսուցողական ծրագրերի գործադրութեան համար, Երուսաղէմի երէցների հովանաւորութիւնը երաշխաւորեց, իսկ իր շրջագայութիւնների ընթացքում, երբ հանգանակութիւններ էր անում՝ միշտ յիշում էր Հրէաստանի եղբայրների կարիքները:

Բայց եւ Պօղոսը բազում անգամներ հաստատում է իր կեցուածքը, որ ամէն եկեղեցի հաւասար է Աստծոյ առջեւ եւ չկայ խորականութիւն Հրէայի եւ Յոյնի միջեւ: Նրա գաղափարները շատ յստակ են. նա ցանկանում է, որ բոլոր քրիստոնեաները, որ ապրում են մէկ համայնքում, պատկանեն մէկ եկեղեցու, սակայն այս առողջ սկզբունքը, որը ըստ էութեան յանգում է հա-

սարակաց օգտակարության, տուեալ դէպքում՝ նորաստեղծ համայնքներին նպաստելու գործին, դառնում է պատճառ քննադատության եւ մասնաւորաւ՝ բախումների հրեայ եւ յոյն գաղութների միջեւ: Նման բարդ եւ սրուած դրութիւն էր տիրում Կորնթոսի նահանգում, որտեղ երկու խմբեր անջատուել էին եւ ծրագրում էին ստեղծել առանձին համայնքներ. «Խորաքանջիւր ոք ի ձէնջ ասէ, Ես Պաղոսեան եմ, եթէ ես Ապողոսեան, եթէ ես Կեփայեան, եթէ ես Քրիստոսեան. իսկ արդ բաժանեա՞լ ինչ իցէ Քրիստոս» (Ա. Կորնթ. Ա. 12—13): Այդ ընդհարումները չազդեցին Պօղոսի եւ Պետրոսի ջերմ փոխարարչական վրայ, ըստ աւանդության, երկու առաքեալներն էլ տեղափոխուեցին Հռոմ եւ արեան մարտիրոսութեամբ վկայակոչեցին Քրիստոսի առաքելութեան տիեզերական ոգին:

Սկզբնաղբիւրներում Քրիստոսի անձին ականատեսների շարքում յիշատակում է նաեւ Յովհաննէսը՝ Ջեբեդիայի որդին, որին կոչում էին «սիրեցեալ աշակերտ»: Նա էլ, Պետրոսի եւ Պօղոսի նման, հեղինակն է համարում Նոր Կտակարանի որոշ գրքերի եւ ամենից անելի առնչում է Եփեսոսի համայնքի հետ: Յովհաննէս առաքելական խմբակի ամենապայծառ եւ Պետրոս առաքեալի մտերիմ գործակիցներից մէկն էր, եւ հէնց այդ պատճառով չափազանց նշանակալից դեր կատարեց Երուսաղէմի եկեղեցական կեանքում: Յիսուսի հետ ունեցած մտերմութիւնը նրան տուեց ակնյայտ հեղինակութիւն: Յաւօք նրա անունը միայն մէկ անգամ է յիշում իր թղթերում, որտեղ Յովհաննէսի, Յակովբոսի եւ Պետրոսի հետ միասին համարում է Երուսաղէմի եկեղեցու «սիւներից» մէկը (Գաղ. Բ 9): Համաձայն աւանդության իր կեանքի վերջին օրերը անցկացրեց Եփեսոսում, որի հիմնադրումը վերագրում է Պօղոսին (Գործք. ԺԹ 8—9): Իր թուղթը, վերջինը, որ ընդգրկումեց Նոր Կտակարանի Կանոնի մէջ, առանձնանում է իր բնոյթով, առաւելապէս հեղինակի Աւետարանի պատգամի խոհական եւ յայտնութեան պատկերացումով, որի համար էլ բիզանդական եկեղեցին նրան անուանում է «Աստուածաբան» անտարանիշ: Յովհաննէս շեշտում է Աւետարանի պատգամի ծիսական նշանակութիւնը:

Ժամանակակից փաստագրական առատ ու արժէքաւոր սկզբնաղբիւրներում յատուկ ուշադրութիւն է տրւում սկզբնական եկեղեցու ծիսական կեանքին³: Այս աշխատութիւնների մէջ լայն տեղ է յատկացուել մկրտության եւ Ա. Պատարագին, որը նախնական եկեղեցու քարոզչութեան մեծարժէք տարրերից մէկն էր համարում: Ըստ որում, ձեռք բերուած առատ ու արժէքաւոր փաստագրական տուեալների շնորհիւ, հաստատել են հրէականութեան ազդեցութիւնը Նոր Կտակարանի ծիսակատարութեան վրայ: Նախնական եկեղեցին Ա. Պատարագի խորհուրդը կատարում էր ճիշտ այնպէս ինչպէս վերնատան մէջ Յիսուսի կողմից կատարուած վերջին ընթրիքը: Գործք Առաքելոցի առաջին 12 գլուխներում պահպանուած տեղեկութիւնից պարզ տեսնում ենք, որ Պետրոս առաքեալը, որը գլխաւորում էր առաքելական դասը, նախագահում էր այդ ընթրիքներին: Պետրոսի այս պաշտօնը ըստ երեւոյթին իմաստաւորում էր Յիսուսի խօսքը «Դու ես վէմ, եւ ի վերայ այդր վիմի շինեցից գեկեղեցի իմ» (Մատթ. ԺԶ 18), «դու յորժամ դարձիս եւ հաստատեսցես գեղքարս քո» (Ղուկա. ԻԲ 32), «արածես զգառիս իմ» (Յովն. ԻԱ. 15—17): Յիսուս հէնց ինքն էր այդ «վէմ»-ը, եւ «հովիւ»-ը. «զի հիմն այլ ոք ոչ կարէ դնել քան զեղեալն, որ է Յիսուս Քրիստոս»: Բայց իր աշակերտներից մէկին տուեց իշխանութիւն՝ կատարելու այս ծառայութիւնը Ե-

րուսաղէմի հրեայ, քրիստոնէայ համայնքի մէջ, որը եւ հետագայում ծառայեց որպէս պատճէնը ապագայ Քրիստոնէական պաշտամունքների:

Ինչպէս արդէն հշել ենք, որոշ ժամանակից յետոյ Պետրոսը հեռանում է Երուսաղէմից (Գործք. ԺԲ 17) եւ նրան փոխարինում է Յակովբոս առաքեալը, որը դարձաւ գլուխ Երուսաղէմի եկեղեցու: Յակովբոսի մահից յետոյ (Գործք. ԺԲ 2) մնացած 11 առաքեալները, Պետրոսի գլխատրութեամբ, սկսում են առաքելական գործունէութեան առաւել հետաքրքիր շրջափուլերից վերջինը՝ համայնքների ստեղծումը, նորաստեղծ համայնքների ղեկավարութեան հոգսերը եւ ծէսերի կատարումը ուրիշների վստահելով: Պօղոս առաքեալը այս նոր դրութիւնը յարգելով, մկրտութեան արարողութիւններ է կատարում միայն շատ բացառիկ դէպքերում, ինչպէս ինքն է խոստովանում. «զի ոչ առաքեաց զիս Քրիստոս մկրտել՝ այլ աւետարանել» (Ա. Կորնթ. Ա 17): Վարդապետութիւն ԺԲ Առաքելոց երկում վկայութիւն կայ.

«Ամէն առաքեալ երբ այցելութեան է գալիս, թող ընդունուի ինչպէս տէրը, բայց թող հիւրընկալուի միայն մէկ օր կամ երկու եթէ անհրաժեշտ լինի, եթէ երեք օր մնայ՝ նա կեղծ մարգարէ է» (ԺԱ:4—5):

Գործք Առաքելոցից եւ Պօղոս առաքեալի թղթերից այն ընդհանուր պատկերացումն ենք ստանում, որ սկզբնական շրջանում համայնքները կառավարում էին հաւաքական իշխանութեամբ, ըստկացած երեք նուիրապետական կարգերից. **եպիսկոպոս** (վերատեսուչ), **պրեսբիտերոսի** (երէց) եւ **պրոփատամեանոսի** (նախագահ): Սակայն քիչ յետոյ, առաջին դարի աւարտին, բոլոր համայնքների վրայ նախագահում էր միայն մէկ եպիսկոպոս: Ինչը պատճառ դարձաւ նման կազմակերպչական վերակազմաւորման: Ոչ մի վկայութիւն չկայ, որ սկզբնական շրջանում որեւէ հակառակութիւն կար եպիսկոպոսի ինքնիշխանութեան դէմ եւ այդ պաշտօնի աստիճանական զարգացումը շատ բնական ընթացք ունեցաւ եւ այն սերտ կապ ուներ պաշտամունքային միջավայրի եւ ծիսական փոխադասութիւնների հետ: Անհրաժեշտ է եպիսկոպոսի աստիճանի պատմական գնահատութիւնը տալու համար դիտել այն սկզբնական եկեղեցու պաշտամունքի էվոլուցիայի հետ, որը պահանջում էր մէկ պաշտօնեայ, որի առաջին պարտականութիւնն էր՝ նախագահել սրբազան պատարագներին: Աղբիւրների հաղորդած վկայութիւններից տեսնում ենք, որ սկզբնական համայնքների կեանքում անհամեմատ առաջնակարգ տեղ ուներ Ս. Պատարագի խորհուրդը: Ս. Պատարագի ծիսակատարութեանը նախագահելու էր մի անձ, Քրիստոսի նմանողութեամբ, Քրիստոսին ներկայացնող: Այս պարտականութիւնը Երուսաղէմի եկեղեցում վստահում էր Պետրոս առաքեալին եւ քանի որ, բոլոր նախնական համայնքները անկասկած հետեւում էին Երուսաղէմի օրինակին, միանգամայն բնական է, որ նրանք պէտք է որդեգրէին Երուսաղէմեան մօտեցումը: Սա հաստատում է որոշակի, երբ ուշադիր կարդում ենք Գործք Առաքելոցի առաջին 12 գլուխները, որտեղ կան նկարագրութիւններ նախնական համայնքների եւ մասնաւորաբար ի միտ ենք ունենում Պետրոս առաքեալի Կոռնելիոսի եւ այլ հեթանոսների մկրտութեան առիթով կատարած յայտարարութիւնը՝ «եկն հոգին տուրք ի վերայ նոցա, որպէս եւ ի վերայ մեր ի սկզբանն» (Գործք. ԺԱ. 15, հմմտ. Ժ 44, 47, ԺԱ. 17):

Սուրբ Իգնատիոս Անտիոքացին լատգոյն ջատագովը **մոնարքիկ** (monarchic) եպիսկոպոսութեան (100 թ Յ. Բ.) որպէս հաւաստի սկզբնաղբիւր՝ որոշ գաղափար է տալիս Զմիռնիայում ձեւաւորուող համայնքի: Այնտեղ եկեղեցին ուներ մէկ եպիսկոպոս—Աստծոյ պատկերը (իկոն), որին օգնում

է երէցներից բաղկացած մի խմբակ, որը այսպէս ասած, արտացոլում է առաքելական դասը, որ տնօրինում էր Երուսաղէմի եկեղեցին.

«Ես խնդրում եմ ձեզնից, ունեցէք ոգին ամէն ինչ տնօրինելու աստուածային համերաշխութեամբ, եպիսկոպոսի նախագահութեան տակ, որը վերցնում է Աստծոյ տեղը, եւ երէցները, որոնք բռնում են Առաքեալների տեղը, եւ սարկաւագները, որ շատ մօտ են մեր սրտին եւ որոնց է վստահուած Աստծուն սպասաւորելու պաշտօնը... բոլորս պէտք է յարգենք սարկաւագներին, ինչպէս յարգեց նրանց Յիսուս Քրիստոս, նույնպէս եւ եպիսկոպոսին, որը Աստծու պատկերն է եւ երէցները, որ ներկայացնում են առաքեալների դասը»:

Սա կարեւոր նկատառում է, քանի որ, Իգնատիոս հայրապետի եկեղեցաբանական մտածողութիւնը բացայայտում է այն միտքը, որ տեղական եկեղեցին ոչ թէ մէկ մասնիկն է տիեզերական եկեղեցու, այլ հէնց տիեզերական եկեղեցին է՝ գլուխ ունենալով մեր Տէրը Յիսուսին եւ առաքեալներին: Ս. Իգնատիոս հայրապետի համար առաքեալների յաջորդականութիւնը ներկայ է եւ կապուած երէցների նուիրապետական կարգի հետ: Եպիսկոպոսի պաշտօնն է ներկայացնել Հօրը, լինել աղբիւր եւ բացարձակ կենտրոն եկեղեցու միութեան, ինչպէս Հայրը աղբիւրն է Աստուածութեան:

Ըստ էութեան եպիսկոպոսի պաշտօնը իր պարտականութեան բնութագրումով կարող էր միայն յանձն առնել մէկ անձնատրութիւն եւ հարկ չկայ ապացուցելու, թէ այդ պաշտօնը, սկզբնական եկեղեցին դիտում էր որպէս շարունակականութիւնը իւրաքանչիւր եկեղեցու այն առաքելութեան, որ Պետրոս առաքեալը կատարել էր Երուսաղէմում: Ելնելով ընդունուած այս պատկերացումից՝ պէտք է մեկնել Յիսուսի խօսքերը ուղղուած Պետրոսին. «դու ես վէմ, եւ ի վերայ այդր վիմի շինեցից գեկեղեցի իմ» (Մատթ. ԺԶ 18): Այս մտածելակերպի ամենայայտնի պաշտպաններից էր Կարդիգինայի առաջնորդ Սուրբ Կիպրիանոս հայրապետը (249—258): Ըստ Կիպրիանոսի, ողջ եպիսկոպոսութիւնը մէկ է՝ շնորհիւ այն բանի, որ «մէկ է հաւատքը»—Պետրոսի հաւատքը. եպիսկոպոսները եկեղեցիներում բազմում են «մէկ եւ միեւնոյն» աթոռի վրայ եթէ խոստովանում են նոյն հաւատքը⁴:

Կիրակնօրեայ սուրբ պատարագը, այն ընթրիքը, որի միջոցով առարկայապէս շօշափում եւ ակնկալում ենք գալիք երկնից արքայութեան ընթրիքը, այն պահն է երբ եկեղեցին դարձաւ իսկապէս ԵԿԵՂԵՑԻ, որովհետեւ այդ պահին էր, որ բոլորը հաղորդակցուեցին Տիրոջ հետ, երբ մկրտութիւններ կատարուեցին, հաւատի վերաբերեալ մանրամասներ ուսուցանուեցին, եւ եպիսկոպոսներ ու երէցներ ընտրուեցին: Հէնց այս առիթով էր, որ հարեան համայնքներից եպիսկոպոսներ այցելութեան էին գալիս եւ մասնակցում նոր եպիսկոպոսների ձեռնադրութեան արարողութեան որտեղ եւ առիթը օգտագործելով, ժողովներ էին գումարում, դասական-եկեղեցական հարցեր քննելու, որոշումներ կայացնելու համար: Նոյնիսկ հալածանքները չկարողացան խանգարել կամ ընդհատել Քրիստոնէաների մասնակցութիւնը Կիրակնօրեայ Պատարագների: Հակառակ բոլոր դժուարութիւնների Քրիստոնէաները շարունակեցին այս սովորութիւնը, որը համարում էին իրենց հաւատի բուն էութիւնը, ինչպէս Գործք Առաքելոցը հրահանգում էր. «եւ էին հանապազորդեալք վարդապետութեան առաքելոցն, եւ հաղորդութեան՝ եւ բե-

կանելոյ հացին, եւ աղօթից» (Բ 42): Նրանք չէին կարող հրաժարուել այս իրական փորձից՝ առանց սրբապղծելու Նոր Ուխտի պատուիրանը:

ԴՈԿՏ. Տ. ՆԵՐՍԷՍ ԱՌԱԳ ՔԶՆՅ. ՆԵՐՍԷՍԵԱՆ
Լոնդոն

ԾԱՆՈԹԱԳՐՈՒԹԻՒՆՆԵՐ

1. Սրբազան Պատարագամատուցք Հայոց... հանդերձ քննութեամբք՝ Հ. Յ. վ. Գաթրճեան. Վիեննա: Մխիթարեան Տպ., 1897, էջ 536:
2. V. Kesich, „The problem of Peter's Primacy in the New Testament and the early Christian Exegesis“, St. Vladimir's Seminary Quarterly IV, 2-8 (1960), 2-25; The Primacy of Peter in the Orthodox Church. The Faith Press, 1973.
3. O. Cullmann, Early Christian Worship. London: SCM, 1953.
4. St. Cyprian, The Lapsed. The Unity of the Catholic Church, translated and annotated by Maurice Bevenot. London: 1957 (Ancien, Christian Writers).

